

Maart 6, 2019

www.awemainta.com

www.facebook.com/awemainta

noticia@awemainta.com

583-1400



AWEMainta

15
año

Anaconda a yega Aruba



**INSCRIBI COMO
BOLUNTARIO
AWO!**



**15 y 16
DI MAART
2019**

Oranje Fonds
voor sociale initiatieven

CEDE
Centro pa
Desaroyo
ARUBA

www.arubadoet.com

LOKE cu a hala atencion ayera hopi tabata un cantidad di vehiculo militar cu a yega Aruba.

E vehiculonan aki cu ta conoci como Anaconda a wordo transporta bou escolta policial pa Marinierskazerne. Ta trata di 12 vehiculo special pa ehercito. E vehiculo tin e forma di un colebra, ta fuerte riba tera y den awa, basta silencioso y mortal, segun ta wordo splica na momento cu Hulanda a haya e versión 2019 di e vehiculo aki recientemente.



Payroll Pro
HRM

- Complete integration of HRM and Payroll
- The #1 payroll software in the Dutch Caribbean
- For all commercial and governmental organizations

Always accurate and
easy customizable

Quick support from our
locally based specialists

VCC
International NV



Tel.: 583-7072 | info@vcc-int.com | www.vcc-int.com

Pachi di 72 año condena pa droga pega na su curpa

Pagina 3

Seis Polis a domina turista Canades despues di a uza algo



DIALUNA anochi laat informacion tawata drenta di un muhe turista cu tawata cana manera perdi rond.

Su actuacion tawata yama atencion di esnan ariba caya.

Mientrastanto polisnan a cuminsa tira bista ariba e caminda di Tanki Leendert. Elo tawata bisa hendenan rond, cu e no sa unda su Hotel ta esey tawata na inicio.

E no tawata confia ningun hende y pa e motibo aki e no kier a subi cu niun hende den auto.

Un agente policial cu a bay na un Fast Food a topa cu e muhe aki. E agente femenino pa buena marcha a acerca e muhe y a ofrece pa hibe su hotel.

Ariba caminda pa e supuesto hotel, e muhe su actitud a cuminsa cambia masha lihe mes. Segun e muhe, e agente ta bezig ta secuestrand'e. Pa evita problema e agente a avisa y patruya di Playa lo a tuma e muhe over.

Drama a start

Momento cu nan a yega warda di Playa, "All Hell Broke Loose". E muhe tawata manera un diabel a drenta su curpa y a cuminsa resisti fuertemente contra e agentenan. Sin conta tur e palabranan sushi den direccion di e polisnan. Un escena masha mahos mes.

Cu bastante esfuerzo a logra pone den boei, esta su mannan. Pero el a keda manda skop. Agentenan cu masha hopi problema a logra hiba e muhe paden, pendiente pa procesa su detencion y despues hibe Shaba caminda elo a wordo cera. Aki tambe cos a bay robes, momento cu nan a hinke den e transportwagen. E substancia cu ela usa a hacie asina agresivo cu el a destrui dos bentana di e Transportwagen di Playa. Akinan mesora mester a sake di e vehiculo pa e no causa su mes un daño serio.

Warda di Noord mester a saca varios agente direccion warda di Oranjestad cu nan Transportwagen.

E biaha aki si polisnan no a take a chance, y a boei e muhe na man y pia kibrando su forsa.

E muhe a wordo carga y hinca den e Transportwagen, hunto cu dos agente policial pa si encaso e bira agresivo atrobe.

Segun nos a compronde, e muhe ta un Canades. Kico ela uza cu a hacie asina aki ta e pregunta.

Un cos ta sigur, ta algo cu por ponebo bira super super agresivo mes. E otro escenario ta cu ken e tawata prome, paso su so no sa unda pa bay busca e droga !

Homber di 72 aña condena pa trabou di mula

DIABIerna ultimo Corte a trata e caso penal contra e homber A.M. di 72 aña, kende tabata envolví den un caso di transporte di droga hunto cu e muhe R.M. (kende no a wordo haya cu droga, y e hombernan E.L. y su tata tambe di inicial E.L.

E ultimo EL, kende tambe ta un persona di edad, kende ta esun cu a organisa e transporte di droga for di Aruba pa Brussels, cu mester a tuma luga dia 31 di augustus.

E señora ta bisa cu e no sa nada di e droga y cu el a bini Aruba cu e grupo pasobra el a pidi un amigo preste placa pa e por biaha pa Boneiro, ya cu e placa cu e tabata pendiente di dje no a yega ainda. E amigo a haci henter e “booking” y a bis’e topa cu e grupo na Brussels.

Na Aruba e lo mester a cumpra e pasashi pa bay Boneiro, ya cu di e forma aki e ta sali’e mas barata. “Mi a biaha pa Boneiro 5 pa 6 dia,” el a bisa Hues. Hues a haya straño si cu e ta haci un biahe asina largo pa keda menos di un siman na Boneiro.

Ya caba na 2015 el a yega di wordo condena pa violacion di ley di droga. Y esaki ta e caso tambe pa e homber Am di 72 aña.

Biaha mas el a haya un castigo cu e no mester a bay cera teniendo cuenta cu su edad. Su Abogado y e mes a pidi pa tene cuenta cu su edad y e hecho cu e tin diferente problema di salud cu den KIA e no por wordo atende. E hoben EL tambe tin un lista largo riba su carchi di castigo, inclusive pa violacion di ley di droga y maltrato cometi na diferente ocasion.

Fiscal a bisa cu tur e splicacionnan no ta aceptabel. RM no tabatin droga pero e tabata biaha cu e grupo cu a pega e droga na nan curpa. Bien por ta cu el a wordo contrata pa vigila e grupo. Den e caso di e homber AM, ya caba el a yega di haya un chens y awor e ta pidi atrobe. E no a siña su les pasobra atrobe el a haya su mes ta transporta droga.

Pa fiscal a keda proba cu tur tres a viola e ley di droga pa cual a pidi 42 luna pa e 10 kilo total di droga cu a keda confisca.

Hues a cera tratamento di e caso y a dicta sentencia mesora. E homber bieu A.M. a haya 42 luna di cual 12 luna ta condicional 3 aña di prueba. E.L. y e muher R.M. a haya 42 luna di cual 6 luna ta condicional cu un tempo di prueba di 3 aña.

Shannon Henriquez ta retira como Presidente di SMAC



RIBA su pagina personal di Facebook, nos a tuma nota di e anuncio di Presidente di SMAC, Shannon Henriquez, unda e ta anuncia su retiro for di e organizacion di Carnaval di Aruba, esta di SMAC.

Shannon Henriquez a probecha na gradici tur hende cu a yude durante e ultimo 3 añanan. Y maske e Presidente saliente mes ta bisa cu e ta sigura cu SMAC a bin pa keda y a desea exito n’e siguiente Presidente.

Shannon Henriquez a keda eligi dia 12 di october 2016, re-emplazando Randy Thiel, e prome Presidente di e fundacion nobo aki pa dirigi nos Carnaval.

Di acuerdo cu statuut, e aña ey un President nobo tin cu wordo eligi pa un periodo di dos aña, y cu posiblemente por prolonga esaki.

Pero asina mes, te ainda ta poco misterioso kico t’e motibo cu Shannon Henriquez a dicidi di retira, siendo e tin tur posibilidad di prolonga su Presidencia. Ta keda na gruponan di Carnaval pa eligi un Presidente nobo, kende mester haci un mihor trabao cu su dos antesornan. Awor cu e periodo di Carnaval ta tras di lomba, e lidernan di grupo mester bin hunto pa tuma decision, kende nan kier mira como dirigente di e Fiesta Cultural di mas grandi di Aruba.

Of manera tin voz ta lanta, busca Tecla Kelly atrobe.



NOS ta cuminsa na felicita pueblo Carnavalesco cu un tremendo celebracion di Carnaval 65. For di awe nos ta drenta periodo di yuna pa 40 dia. Cuanto di boso lo haci'e? Haci algo den e periodo di Cuaresma aki.

+++++

Carnaval di otro aña ta un siman mas tempran compara cu e aña aki. Pesey cuminsa prepara na tempo. No laga tur cos pa ultimo ora. Ademas ya caba por a tende cu masha hende kier bay Corsou pa celebra nan di 50 aña di Carnaval.

+++++

Pa straño cu por zona, Minister di Husticia, Andin Bikker a ser adverti cu presonan ta na punto di lanta, pero nada a ser haci pa preveni esaki y diadomingo ultimo, esaki a tuma lugar. Si morto a cay, kende nos mester responsabilisa? Ki dia lo nombra un Director nobo pa KIA? Esey lo yuda?

+++++

E aña aki durante varios di paradanan di Carnaval, tabatin menos detencion, segun Polis, pero tabata parece cu tabatin mas pelea, cu nunca. Aparentemente ningun detencion no a cay.

+++++

Dia 18 di maart ta aki un siman y mei, pero te ainda nada cu lo pasa e acto protocolario pa San Nicolas, manera Alan Howell ta desea. Wel nos por bisa for di awor, cu esey lo no tuma lugar e aña aki, y manera Chicote a bisa anteriormente caba, semper un Acto Protocolario ta tuma lugar na capital di e pais y San Nicolas ainda no ta capital di Aruba.

+++++

Juan Guiado, Presidente interino di Venezuela a drenta su pais via porta dilanti, lagando Nicolas Maduro cu su menasanan, cu lo detene asina cu e pisa tera atrobe. Demostrando cu Nicolas Maduro tin wel di peña saca, e no tin autoridad mas. Ademas si a mishu cu Guiado, Merca sigur lo a cay aden. Pero Russia, cu ta aliado di Nicolas Maduro, tambe a laga Maduro cay.

+++++

Awor Carnaval ta tras di lomba, ban prepara pa celebra Dia di Himno y Bandera.

+++++

Ministro Otmar Oduber insinua, cu Jan van Nes ta contra di e hotel na Baby Beach "pasobra ... e ex-Director di ATA mes tin un restaurant den un di e condominionan pabao di nos isla" ta irracional, ta un lamentabel cuestionamento di e integridad di Jan van Nes. E ta un insulto cu Jan van Nes no ta merece.

+++++

Y pa Minister Otmar Oduber bisa cu e tin hopi respet pa Jan van Nes despues di a cuestiona su integridad, bo ta puntra bo mes,

"Con e por tin respet pa un persona di ken e ta cuestiona su integridad? Sr. Oduber no ta realisa e daño cu el a haci na Jan van Nes su persona?"

+++++

Manera Minister Otmar Oduber mes a admiti, hopi ta opone e hotel. E.o. e ta menciona Greg Peterson di ABC, Partido Raiz, varios ONG, politiconan, etc., etc., kendenan a vocifera nan oposicion n'e hotel. Nan no tin restaurant pabou di brug!

Jan van Nes ta djis un di miles cu ta contra e hotel cu Minister Otmar Oduber ta defende cu hopi animo, apesar cu e Gobierno mes a declara un moratorio tocante mas hotel.

Anto ta net Jan van Nes, Otmar Oduber kier cuestiona? Pakico?

+++++

Un aña y mei despues, cu hendenan di MEP a para dilanti di e refineria, demandando pa habri e refineria. Awor cu nan ta den Gobierno, bo no ta mira nan cara. Unda p.e. un Glenbert Croes, kende a pasa como e persona cu a negocia cu PDVSA pa CITGO habri e refineria ta. Awor tur hende por conclui cu Glenbert Croes a monta un show, nada mas. Dicon awor e no ta na Venezuela pa reuni cu Nicolas Maduro pa sikiera haya placa pa por paga e trahadornan di CITGO, cu ta perdiendo trabao?

+++++

HansMat, ta un compania cu a laga sa cu ningun hotel por wordo construi na Seroe Colorado. Pasobra den sub-suelo tin masha quimico dera cu ta dañino pa salud di hende. Ta cua turista lo hospeda den un hotel, cu den su sub-suelo tin quimico dera. Asina cu turistanan Mericano sa di esaki, e lo bira un propaganda negativo pa turismo di Aruba.

+++++

Tur e bla-bla cu Gobierno tin un comision negociador na Merca, cu ta papia cu Gobierno di Donald Trump, conoci como un mentiroso, lo yuda na lanta e sancion riba CITGO maske pa parcialmente p'e trahadornan por haya nan salario. Pero te awe nada y lo no tin nada tampoco pa nan.

+++++

E siman aki Grupo 7 a duna di conoce cu nan ta preparando un manifestacion grandi, pa mostra cu Gobierno actual no t'e Gobierno di cambio cu nan kier. Momento a yega pa mustra Gobierno sea cu nan ta haci e cambio desea, of nan tin cu bay cas.

+++++

Den e Gobierno aki, tin solo Minister cu ta haci negoshi. Mester stop di tuma e pueblo aki di haci, segun Michael Williams. Un tristeza, e siman aki Prome Minister Evelyn Wever Croes ta biaha pa Merca pa atende un reunion di hende muher. Pero lo probecha di papia cu Gobierno Mericano, pa wak con por yuda mengua e sancion riba CITGO.

+++++

Si no tin placa pa pueblo, ento pakico tin placa si pa construi un Boardwalk. Anto pa hendenan cu a "horta" masha tereno pa nan mes, segun vocero di Grupo 7.

+++++

Gobierno aki tin pasenchi di pueblo aki den boter. Tene cuidao y Ministernan den corrupcion, mihor nan baha prome cu e lat.

+++++



MANERA cu a anuncia, for di dia 1 di maart 2019 Serlimar a inicia cu cobranza pa recogemento y maneho di desperdicio. Esaki despues di combersacionnan cu a tuma lugar cu sindicato y organisacionnan di pensionadonan na Aruba.

Ultimo lunanan mas y mas comunidad por a mira un Serlimar cu gran mehoracion den e servicio cu nan ta brinda di recogemento di desperdicio na cas y limpieza den barionan rond Aruba, mantencion di matanan, limpieza di acera, recogemento di animalnan morto y e trabou continuo rond Aruba conhuntamente cu DOW y City Inspector na casnan bandona entre otro!

Aworaki ta inicia e proceso cu for dia 1 di maart ta cobra 25 florin na cada punto di recogemento di sushi. Esaki lo wordo cobra por medio di un 'invoice' cu Serlimar lo manda na luna juni di tur aña. Riba e invoice lo indica cobranza di full e aña.

Considerando cu e aña aki, esta 2019 ta cumiunsa for dia 1 di maart, comunidad lo ricibi cobranza di 25 florin pa luna pa un periodo di 10 luna solamente.

Apesar cu e cobranza ta wordo manda 1 biaha pa aña, e ciudadano ta ricibi e oportunidad pa paga pa luna, pa kwartal of e aña completo.

Por haci esaki na oficinanan di Serlimar, oficinanan di MFA rond di Aruba, Online, of atraves di banco por medio di 'standing order'.

Clientenan di EcoTec of otro compania lo bin na remarke pa un dispensacion di e tarifa residencial conforme cu ley nan existente.

Pa bin na remarca p'e dispensacion aki mester bin cu un comprobante cu ta cliente di otro compania y no di Serlimar. Pensionado cu ta cay bou di e plafond di pensioen lo paga 10 florin di tarifa residencial. Pero mester bin cu e comprobante di pensioen pa bin na remarca di e tarifa social aki.

For dia 1 di maart ultimo

Serlimar a cuminza cu cobranza pa recogemento y maneho di desperdicio



AWM
infrastructure



N.V. Arubaanse Wegenbouw Maatschappij
Barcadera 122
Aruba

Telefoon: 585-3007
Fax: 585-3766
E-mail: krohn@alboaruba.com

Pa reforsa nos team den garage nos ta buscando:

Allround Heavy Equipment Diesel Monteur

E monteur lo ta responsabel pa mantencion diario y mantencion preventivo di tur material, e.o. material industrial mobil y vehiculonan usa den construccion general y construccion di caminda.

Interesadonan por tuma contact cu N.V. Arubaanse Wegenbouw Maatschappij, Departamento HR, Sra. Krohn, tel. 528-5808, ext. 225

Minister President contento cu cooperacion di Hulanda



RECIENTEMENTE Aruba, pa medio di Ministerio di Husticia, a haci dos peticion pa ayudo cerca Hulanda. Secretario di Estado Knops, encarga cu Asuntonan di Reino, a informa cu Hulanda a aproba su apoyo pa cu e peticionnan aki. Tur dos peticion ta especificamente pa ayudo tecnico temporario di IND (Immigratie en Naturalisatie Dienst) pa por canalisa y procesa e peticionnan pa asilo den un manera eficiente y rapido den acuerdo cu tratadonan vigente.

“Nos ta contento cu e apoyo tecnico temporario ricibi fo’i Hulanda”, Minister President Evelyn Wever-Croes a duna di conoce. “E plan di accion cu e especificacion di gastonan (prijskaartje) ta kedando cla y nos ta spera di por haya e mesun respuesta positivo y rapido for di Minister Knops tambe”.

E ayudo tecnico temporario ta consisti di personal specialisa den training y procesa peticion di asilo. Gabinete Wever-Croes ta treciendo solucionnan pa e problematica di asilo.



Gobierno di Aruba: **Benny Sevinger ta lubida cu ta e causa e problema di ilegalidad na Aruba**

Parlamentario Benny Sevinger recientemente a expresa su mes na forma masha baho contra esnan cu ta ilegal na Aruba. Señor Sevinger ta hopi bon na haltura cu e problema di ilegalidad ta algo cu Gobierno aki a hereda di e gobierno anterior. E falta di maneho bou di Benny Sevinger y Mike Eman a pone cu awor cu ta purbando pa trece orden den e des-ordo crea, inconsistencianan den nan maneho ta wordo presenta den cifranan.

Actualmente, Gabinete Wever-Croes tin un comision cu ta encarga pa haci analisis basa riba informacion concreto y legal presenta fo’i diferente departamentonan concerni.

E situacion interno na Venezuela tin un impacto grandi den region y nos isla tambe ta experienciando esaki. P’esey, Gabinete Wever-Croes no por acepta e ponencia di Benny Sevinger encuanto di e problema di ilegalidad y kico ta bay haci cu esaki.

E problema di ilegalidad no ta solamente e Venezolanonan cu lo por ta kedando atras, sino ta refleha e maneho inconsistente y incoherente di e gobierno anterior.

Manera anteriormente a ser informa, asina cu gobierno a haya sa di e certificadonan di UNHCR, a reuni cu ehecutivonan di UNHCR pa pone un paro inmediato na esaki. Awo, gobierno tin un comision ta trahando riba e problematica di asilo y a pidi ayudo tecnico specialisa temporario for di Hulanda, cual a ser otorga tambe.

Gobierno di Aruba ta haci un apelacion na Benny Sevinger pa conhuntamente cu Gobierno, yuda informa e comunidad di e peso y peliger relaciona cu hospeda y/of duna trabou na personanan ilegal. Especialmente promesanan falso pa trabou por ser considera den e ambito di traficacion di persona y abuso laboral.

Gobierno di Aruba, conhuntamente cu esfuersonan grandi haci pa departamentonan specialisa, a logra pa Aruba haya TIER I den su maneho pa combati traficacion di persona y abuso laboral y den cuadro di interes nacional, ta crucial pa esnan den Gobierno y Parlamento uni den e causa aki.

Esaki tambe ta conta pa personanan cu ta para garantia pa stranhero pasobra esaki ta un responsabilidad grandi cu lo por tin consecuencia financiero p’e persona.

Gabinete Wever-Croes ta spera di por conta cu apoyo di esnan den oposicion, si nan tambe tin Aruba na pecho, pa conhuntamente contribui pa evita ilegalidad, traficacion di persona y abuso laboral.

Parlamentario Sue-Ann Ras (MEP):

“Actitud inconsciente y irresponsabel di nos propio hendenan ta keda preocupante”

E temporada di gran celebracion di Carnaval ta tras di lomba y ta yega momento pa reflexiona y recapacita, specialmente si lesa e relatonan di Polis den e medionan di comunicacion.

Segun Parlamentario Sue-Ann Ras: “Realidad ta keda, cu e irresponsabilidad di parti di nos propio hendenan, cu ta dicidi di bebe alcohol y no tin control di nan limite, unda por tin consecuencia fatal, ta keda un asunto alarmante!”

Ban spera cu e temporada aki di Cuaresma realmente haya su nificacion y cu nos hendenan cuminsa reflexiona riba nan comportacion y con nan por mehora esaki pa nan mes y pa otro.

DETENCION

“Cu detencion di hende durante varios di e paradanan a baha considerablemente, ta un bon comienso, pero esaki ainda ta preocupante, mirando cu edad di e detenidonan ta keda uno relativamente hoben,” según Sue Ann Ras.

Cu e bahamento aki ta nifica cu nos hendenan cu ta bay wak parada, por lo menos tabata poco mas consciente di nan comportacion y ki consecuencia esaki por tin, si acaso nan comportacion ta socialmente inaceptabel dor di surpasa nan limite di uzo di alcohol of otro substancia ilegal.

Pero ainda ta preocupante, con Polis mester haci uzo di su autoridad, pa evita un escalacion di situacion y mester a detene varios hende, dor di nan comportacion violento y peligroso.

ABUSO DI MUCHA

“Mi sa cu esaki ta un topico cu tin hopi sentimento y opinion. Pero mi no por keda sin menciona si, cu hopi biaha nos ta cla pa apunta otro, cu no ta haciendo e trabounan necesario, pa yega na solucion di castigo mas severo pa e abusadornan.

Sin embargo ta di lamenta, cu durante e eventonan di Carnaval, por a nota claramente varios mucha y baby den un situacion sigur no adecuado: solo, biento di anochi, desordo, calor, incomodidad y tin caso hasta pio, unda tin violencia y abuso di alcohol. Y sin papia di e forma cu algun mayor ta opta pa bisti nos mucha muhernan”, Sue Ann Ras a cuminsa na bisa.

E responsabilidad primordial ta keda di mayor y nan mester ta consciente di e escogencianan cu nan ta haci y den ki situacion nan mes ta exponiendo nan yiunan.

“Cu mester bin cu castigo mas severo tambe ta di compronde y apoya. Pero no por descarta cu na Aruba tin castigo cu ta inicia na minimo 4 año y tin un maximo te 12 año. Pa aclarea y enfatiza, niun castigo ta suficiente pa un caso di abuso di mucha, pero ta di lamenta cu pa hopi año, no a traha riba mehoracion di e procesonan, pa yega na haya un abusador culpabel.

Nos no mester lubida cu ni sikiera un colposcoop tin, pa saca potret di e victimanan cu por uza den Corte, como tambe e traduccionnan di raport, cu ta keda un punto di atencion urgente cu mester mehora, mescos cu e tempo cu ta pasa, prome cu un victima indica kico a pasa cu ne.

Tur esaki y algun detaye mas ta loke ta impedi pa un Huez yega n’e pruebanan real pa sentencia un abusador, di cual den hopi caso, tambe tabata un victima di abuso”, Sue Ann Ras a enfatisa.



CORE BOU DI INFLUENCIA

“Tin biaha mi ta puntra mi mes, kico mas mester pasa, cuanto victima mas mester tin, pa nos hendenan realisa e daño y dolor inmenso cu coremento bou di influencia por causa,” Sue Ann Ras a sigui bisa.

Durante control di e paradanan, riba di mil chauffeur mester a supla dor di e alcosensor, pa controla si nan ta surpasa e limite di alcohol permiti di 220 ug/l. Alrededor di 40 chauffeur a surpasa esaki y tabatin caso hasta unda a haya chauffeur cu mas di 500 ug/l, sin kita afo, cu tabatin chauffeur cu no por a ni supla mes of para riba nan pia drechi.

“Lamentablemente Aruba a conoce hopi caso doloroso tocante core bou di influencia di alcohol y su consecucionnan y aparentemente ainda nos ta haya rond di 40 chauffeur irresponsabel y inconsciente, di kico t’e consecucionnan y ki dolor y tragedia e acto aki por causa henter un famia” Sue Ann Ras a finalisa bisando.



Anuncio

Debi na un reunion, nos ta cera tempran awe diaranson 6 di maart 2019:

AZV San Nicolas (ImSan) 14:30

AZV Oranjestad ta cera temporalmente

Pa servicio por acudi na AZV Noord te 16:00 or.



Control contra cobamento na Sero Cristal tumando lugar diariamente dor di DTI y BCI

PA locual t'e companianan Cala Romana y Caribbean Beton por indica cu e companianan aki no a ricibi 'hindervergunning' pa haci trabou di cobamento n'e area di Sero Cristal, Director di Directie Infrastructuur en Planning (DIP) sr. Jaime Maduro ta informa.


Pais Aruba a yega na un acuerdo cu nan lo muda nan actividadnan y stop di causa daño y molester n'esnan cu ta biba den e cercania.

Conforme declaracion di Director di DIP Jaime Croes: 'E companianan aki ta trasladando nan actividadnan y nan no mag di coba mas.'

Locual ta tumando lugar y cual ta potretan cu por a tuma nota di dje den medionan social ta, cu nan ta trasladando e santo p'e sitio na unda e companianan lo muda pe cu ta na Barcadera.

Adicionalmente ta mandando team di Bureau City Inspectors (BCI) y DIP diariamente pa percura cu e companianan aki ta mantene nan mes n'e palabracionnan haci.

Hecho ta cu nan no tin hindervergunning pa opera den e area cu ta natuurgebied, sr. Jaime Croes a conclui. Ministerio ta manda un palabra di danki pa tur ciudadano cu ta monitoreando e situacion y informando pais Aruba .



Seramento di caminda en conexion cu asfaltamento

Departamento di Obra Publico ta informa pueblo en general y specialmente nos automobilistanan cu ta haci uzo di e caminda di Sabana Blanco, cu dia 5 di maart te cu dia 8 di maart 2019 lo bay ser'e parcialmente pa cuminsa drecha e caminda y diabierna asfalta e caminda.

E caminda cu lo haya asfalt ta Sabana Blanco 54a te cu Sabana Blanco 147h

Lo indica e ruta alternativa cu baricada y borchinan di aviso y e orario di seramento lo ta di 7'or di anochi pa 3'or di marduga



En conexion cu e trabounan menciona Departamento di Obra Publico ta pidi pa tene cuenta cu e inconveniencianan cu lo por surgi pa cual nos ta pidi nos disculpa.

FOR SALE TA BENDE TE KOOP

- Tereno comercial na San Nicolaas ,serca DIMAS awor CITGO/Postknt Grandura 1225 m2 / infrasstructurateicaba.
 - Propiedat comercial na Dakota, edificio 550 m2/ tereno 1482 m2 cu llugar20 auto por parkeer
 - Edificio Comercial na Av. Milio J Croes,bon pa oficina accountant/dokter/laboratorio/abogado l otrocommercio
- Tur tintaxatie ,por haci un cita pa wak e propiedatnan/info, jama 594 3194
També pa inversion financieroesaki ta un bon idea

Ultimo dia pa kita tur trailer y tent di Carnaval ta dia 11 maart 2019

Despues di e fecha aki Bureau City Inspector y D.I.P lo tuma accion



AYERA Bureau City Inspector a haci un recorrido di control riba e ruta di Carnaval pa wak si ya trailer y tentnan cu a ser buta pa Parada di Carnaval a ser kita.

Si esaki no t'e caso caminda cu tin basta tent y trailer ainda y cu tin un contrato firma cu D.I.P. cu dia 11 maart t'e dia cu tur kavel, tent, auto of mihor bisa tur loke cu bo a uza pa Carnaval mester ser kita di e sitio cu ta Vondelaan y L.G.Smith BLD.

Tambe BCI kier a pidi cooperacion di esnan riba veld di Cricket pa por fabor ban coopera y laga kita esakinan mas pronto cu ta posibel.

Tene bon na cuenta cu bo a firma un contrato cu lo kite tur cos prome cu e fecha stipula. Nos tur a goza Carnaval 65 y awor nos tur tin di mantene nos Aruba limpi bek. Pesey BCI kier bolbe pidi pa ban kita tur cos manera un bon Arubiano cu nos tur ta.

INTERUPCION DI CORIENTE

En conexion cu trabaonan necesario, coriente lo wordo interumpi den vecindario di:

- Paradera (un parti)
- Rooi Afo (un parti)
- Seroe Patrishi (un parti)
- Seroe Blanco (un parti)
- San Barbola (un parti)
- Modanza (un parti)

DIABIerna 8 DI MAART, 2019

FOR DI 8:00 AM PA 4:00 PM

Elmar ta pidi disculpa pa e inconvenencia cu e interupcion aki por causa.

ELMAR
Redefining Energy

Danki pa e comprension

523 7100 | customerservice@elmar.aw

Un baluarte grandi a laga nos !

Eric Agumbero, Pachi, nos ta sinti bo falta



APESAR di un periodo di hopi lucha cu su salud, fayecimiento di Eric Agumbero, a causa shock y un ola grandi di tristesa den partido AVP. E partido pa cual su curazon tabata bati duro. E partido cu e tabata stima cu pasion y dedicacion. E partido cu tabata parti grandi di su bida. Eric Agumbero, cariñosamente yama Pachi, a cuminsa cana banda di Henny ora cu Aruba tabata pasa den momentonan dificil. Na fin di añanan '80 ora cu Aruba a caba di haya su Status Aparte, Erik tabata forma parti integral di e partido berde.

Un persona sumamente leal na partido. Semper Pachi tabatey manera un clabo, den momentonan bon y den momentonan menos bon. Si nos tabatin mester di un man pa yuda den cualkier evento, Pachi tabatey, firme manera un palo di kwihi cu reisnan cu ta core largo y hundo. Durante Concierto di Speransa, Celebracion 18 di Maart y otro eventonan cultural y special cu partido ta organisa, Pachi tabata e motor nan tras.

'Puntra Pachi', tabata un frase cu hopi den partido tabata usa semper ora cosnan tabata pega. Pachi tabata sa cu nos a apreci'e y stim'e cu tur loke nos tin den nos y e na su turno a stima nos cu henter su alma y curazon. Carnaval ta tras di lomba y partido a haya masha falta di Pachi pasobra e semper tabata traha riba e cahanan cu partido ta parti riba e rutan di Carnaval. Dianan largo, ta corta, plak, corta plak, te ora delaster un caha a keda cla. Den su bario na Dakota y Tarabana, pero tambe den Aruba henter e tabata hopi stima, pasobra mescos cu e tabata stima su partido e tabata stima su pueblo y tabata semper cla pa yuda tur hende. Den campaña su cas semper tabata esun cu e prome bandera berde y esun di mas grandi.

Den periodo di eleccion e tabata un activista y dirigente di bario cu hopi conocimiento y creatividad pa trece e mensahe di su partido cerca tur hende. El a stima su famia den un forma ehemplar.

Algun aña pasa Pachi a bira malo y na e momentonan dificil ey di su bida, nos a sufri y sinti dolor hunto cu ne. Pa su enfermedad devastador Pachi mester a bay afo pa un periodo largo. Durante ultimo eleccion e tabata na Aruba pa un temporada cortico y apesar cu ya e no tabata por a papia, el a bula den Jeep cu lider di partido Mike Eman pa core Aruba rond cu ne pa brinda di e forma aki apoyo na Mike y su partido. Di prome momento cu Mike a drenta politica Erik nunca a kita di su banda. Manera un tata, un ruman grandi e tabata stima Mike y cuide cu alma y curpa. No unicamente den politica, pero tambe como amigo. Asina Erik a para hunto cu Mike y famia Eman na momentonan dificil di malesa y fayecimiento di Blanche Eman. E tabata na nan banda di dia y anochi.

E curazon cu tabata bati duro pa partido AVP y su lider, a stop di bati y Pachi a pasa pa un otro mundo. Un mundo unda no tin tristesa, ni dolor tampoco sufrimento. Un dia nos lo topa otro. Esey ta nos consuelo. Na su señora, yiunan, su nietonan, amigo y conocirnan ta bay nos mas sincero palabranan di pesame. Eric su famia y su curpa lo yega Aruba diarason atardi. Partido y famia ta prepara un despedida di honor y amor, manera e merece.

Sosega na Paz, nos amigo, ruman, activista y dirigente, Eric Agumbero.

Mike Eman

Partido di Pueblo Arubano AVP

Di acuerdo cu Gobierno, di acuerdo cu e procesverbal:

Mike Eman y Nicole Hoevertsz tabata sa tur loke Paul Croes a haci

SEGUN Codigo Penal tur hende cu tin conocimiento di un caso penal ta obliga pa haci denuncia. Mirando contenido di e procesverbal den e caso di Paul Croes cu na 2015, na 2 ocasion Secretaria di Consejo di Ministro, Nicole Hoevertsz a declara cu el a papia cu Paul Croes riba e negoshi cu tur e “ontheffingen”, e pregunta ta surgi ki dia Mike Eman y Nicole Hoevertsz lo wordo investiga, segun un comunicado di Gobierno.

Pasobra ta mas cu bisto cu Mike Eman tabata sa tur cos di e “toko” di Paul Croes. Pregunta importante ta: Ken a manda Nicole Hoevertsz papia cu Paul Croes, pasobra Paul ta su hefe y e no tin nada di bisa Paul.

Si tabatin algo pa “reclama” ta Mike Eman como Ministro Presidente cu mester cuida integridad di su Ministernan mester a haci e trabou sushi aki y no manda un ambtenaar haci su trabou p’e.

Aki un investigacion lo “incrimina” Mike Eman den e caso “IBIS”, pasobra ya for di 2015 e tabata sa di e negoshi cu permisonan di Paul Croes. Pregunta si e tabata sa, di acuerdo cu nos codigo penal, ki dia na 2015 el a duna aangifte cu e ta obliga pa ley.


Mirando awor e declaracion di Mike Eman cu caso IBIS lo stroba politiconan di haci fundraising, ta implica cu Mike ta “sostene” e hechonan di Paul Croes, unda e ta bisa hasta cu e ta preocupa.

Mirando con Mike Eman cu su declaracion a “incrimina” su mes no ta husto cu e ta colga Paul so, mientras e tabata sa for di 2015 caba.

Defendiendo e manera di “collect” placa aki ta encera cu bo tambe ta aden. Ta imperativo un investigacion di e rol di Mike Eman como Ministro Presidente y lider di AVP.

Mike “je stond erbij en keek ernaar”, acaso bo mester a sacrifica Paul, pasobra su fam ta Croes, Gobierno kier sa.

Rotonde di Santa Helena ta cera pa trabounan di cobamento y pasamento di kabel





Departamento di Obra Publico ta informa pueblo di Aruba en general y specialmente nos automobilistanan cu ta haci uzo di e caminda di Caya Ernesto Petronia, cu entrante awe 6 di maart 2019 for di 9’or di mainta lo bay cera e rotonde di Santa Helena p’asina utilidadnan por pasa kabel abou y pa stret e caminda. Trafico ta wordo desvia via Katunastraat, Scopetstraat, Aloëstraat y Pitastraat p’asina subi Caya Ernesto Petronia. Duracion di e ceramento di e caminda lo ta 1 luna.

En conexion cu e trabounan menciona Departamento di Obra Publico ta haci un peticion na tur automobilista pa no haci uzo di e camindanan menciona y ta pidi pa tene cuenta cu e inconveniencianan cu lo por surgi pa cual nos ta pidi nos disculpa.

CARNIVAL 65: TREMENDO









Desiree Correa y Olga Buckley a participa na di 28 Feria del Libro na Cuba



TUR aña na february, e organisadornan di Feria del Libro ta transforma Habana den un escenario interesante pa escritornan, casnan publicitario, libreria, casnan editorial, distribidornan di buki, agencianan literario, ilustradornan y specialmente e lesadornan. Mayoria di participantenan ta di Cuba mes, pero tin hopi ta biaha pa Habana di diferente parti na mundo pa experiencia e grandeza di 'Feria Internacional del Libro'.

Asina tambe, e aña aki un delegacion di 12 escritor, poeta, cuentista y novelista di Aruba, Bonaire, Corsou y Sint. Maarten a biaha pa Habana. Tur aña e feria ta dedica na un pais invita, e aña aki tabata Algeria y un escritor Cubano cu a destaca pa su aporte literario, e aña aki e honor a toca Eduardo Rafael Heras León.

'Feria Internacional del Libro' a tuma lugar di 7 pa 17 di februari 2019 na diferente localidad rond di Habana. E cede principal t'e forti 'San Carlos de la Cabaña' na Habana. E feria ta un agasaho di letter, palabra y frase pa deleite di famia. E feria ta enfoca hopi riba ofrece famianan un experiencia di balor agrega pa nan desaroyo literario, cultural y historico. Prijsnan di buki ta hopi abou, bo por bisa casi regala pa stimula lesamento y desaroyo.

Ambos escritor a experiencia esaki den presentacion di mucha y hoben. Nan forma di expresa ta di nivel halto y elocuente.

E Feria Internacional di Buki na Cuba ta ofrece un espacio pa dialogo y promocion na mas di 40 pais y nan autornan cu ta participa. Algun actividad principal ta reunion, tributo, panel, lectura, contamento di cuenta, presentacion di buki, musica y baile.

E participantenan di Caribe Hulandes a presenta nan obranan y a duna tambe un bista di cultura y tradicionnan di nan paisnan.

Di Corsou, Diana Lebacks, Ronny Lobo, Hilda de Windt Ayubi, Francis de Windt, Roselyn Jesserun, Krishnan Panday, di Bonaire Denise Request, di St. Maarten Loekie Morales y di Aruba Desiree Correa y Olga Buckley.

Sylvia Jungslager, viuda di e autor Hulandes-Curasaleño Roel Jungslager dfm (Leo Regals) a ricibi un reconocimiento postumo p'e autor pa su obra literario. E reconocimiento aki ta specialmente p'e storianan di e autor p'e mucha Cubano.

Tanto Desiree Correa como Olga Buckley ta sumamente contento cu e invitacion cu nan a ricibi di e 'Departamento di Relaciones Internacionales de Cuba', cu a duna nan e oportunidad di oro aki pa habri nan horizonte como escritor.

Guardian Group Fatum ta felicita Carnaval Dream Team



Guardian Group Fatum ta felicita Carnaval Dream Team cu e bunita roadpiece di Rey Momo cu a habri e paradanan grandi di nos 65 Carnaval na Aruba, cu un bista impresionante.

Palabranan di felicitacion ta bay na Carnaval Dream Team lidera dor di Donald Croes. Increibel e resultado di trabou den corto tempo cu hopi disciplina, dedicacion y amor pa cu nos Carnaval. E Dream Team tin un experiencia enorme den loke ta Carnaval y tur detaye riba e roadpiece a wordo admira y aplaudi durante paradanan.

Guardian Group ta orguyoso di por a yuda sponsor e roadpiece di Rey Momo y principalmente pa cu e premicacion den categoria Roadpiece Campeon. Pabien na Carnaval Dream Team.

Minister Dangui Oduber ta bezig cu varios proyecto di iluminacion na veldnan



MINISTER di Turismo, Salubridad y Deporte sr. Dangui Oduber a bisa cu deporte lo haya e atencion necesario y lo pone deporte bek como prioridad.

Pa 8 aña largo Gobierno di AVP a negligha deportistanan, deporte y complehonan deportivo por completo. Ta un cantidad di Compleho Deportivo cu ta resorta bao maneho di Fundacion Facilidatnan Deportivo ta den cay den otro y ta den mal estado.

E ta un berguensa cu durante 8 aña no por a presenta un plan general di mantencion p'asina por mantene tur e complehonan deportivo na un nivel aceptabel.

Minister Oduber su maneho di deporte ta dirigi riba stimula movecion den barionan, inverti den facilidatnan deportivo, pone iluminacion na veldnan y sin lumbida e proyecto di yerbe artificial.

Lo duna e deportista atencion y muy en especial esnan di alto rendimiento. Lo stimula y pone fondo disponibel

pa prepara atletanan pa Olimpiada.

Despues di 8 aña porfin ta duna atencion na hopi cos cu a bay robez den deporte.

Como parti di maneho di Minister Oduber ta percura ta tur facilidad ta goza di bon iluminacion. Asina aki Minister Oduber a percura pa cambia tur e bombiyonan y pone nobo na veld di Duracell y tambe pronto Kudawecha tambe lo ta na turno.

Minister ta convenci cu na momento cu duna atencion n'e facilidatnan esaki lo stimula nos hobennan pa practica mas deporte.

Porfin Minister Oduber ta mira luz na horizonte den e caso di Lotto pa Deporte y pronto lo tin control bek pa por haci hopi mas cu e fondonan aki.

Unabes esaki t'e caso por spera cambionan drastico den deporte caminda Minister Oduber porfin por cuminsa ehecuta su maneho y vision pa cu deporte.

Bon dia yen di alegria

Skirbi pa Ruthy "Lady Ruth" Vrieswijk-Bergen



HOPI lo t'e bunita recuerdonan di nos dushi Carnaval 65. Hopi lo t'e potretnan saca riba celular of cu camera digital. Y hopi t'esnan cu lo a keda cu un dolor di cabez, despues di tanto dalmento di drinks talbes?

Si no pa su siguiente dia, probablemente e dos dianan sigui. Nos tambe tabata di fiesta recientemente, no cu actividad di Carnaval, pero celebrando cu un bunita hende muher su di 75 cumpleaños.

Un hende muhe talentoso y hopi bendiciona. Su nomber ta Modesta de Mei, "Mona" pa tur su dushi hendenan.

Lady Ruth tabata hopi contento cu e yamada telefonico di sra. Fina Geerman pa invita mi tambe pa ta parti di e grupo cu a bay canta bunita canticanan pa nos bunita amiga Mona, riba dia di su cumpleaños diadomingo dia 24 di februari ultimo. Nos a bay den careda di 4.30 pm di atardi y tabata un placer haci conoci cu Fina y su yiu homber Errol, kende a fungi como e sound man. Nos a bin topa cu e dobel di Jeon, para tras di e BBQ pit, cu atencion riba e dushi hamburg-

ers y hotdoggs. Nos a keda puntre varios biaha cu te mes ta Jeon, pero el a bisa nos cu no, cu mas hende ta kere cu e ta parce Jeon masha hopi mes.

Nos a parti e blaadje cu e canticanan riba nan pa tur presente, entre nan, e conocido cabayero di WEB NV algun tempo atras, sr. Jossy Lacle y su bunita sra.esposa, tambe Juana y Elena, ruman muhernan di Mona, Aura, Eta y mas di e dushi hendenan di Mona.

Nos por a tende for di Mona cu e bunita yiu muher princes di Elena cu Mai, Marlene, tambe a haci aña e mesun dia cu Mona.

Tabata pues un dobel celebracion cu dushi co'i come, co'i bebe y un super dushi ambiente, bay bek un crenchi den tempo cu nos canticanan ful na Papiamento manera Aya na ceri trapi, Atardi, Cunucu di zuid, Nos deseo, Bau pali tamarijn y hopi mas.

Hasta e miembronan hoben di famianan presente a canta cu animo. Tabata asina bunita cu solo bahando, cantando cu hopi amor y carino pa Mona y Marlene. Marlene y otro hobennan adulto cu a participa den e Parada di Luz di Carnaval tabatin yen di animo ainda, celebrando den curazon di Sero Lopes, aunke kizas un tiki cansa di e Lighting Parade. Ki bunita cu alegria tabata e reaccion di Mona, kende a ricibi y acepta su serenata full na Papiamento.

Mi ta corda cu añanan atras, Mona a conta mi varios storia di antes, tempo di bay scol. Nos conoce Mona tambe como un di e cocedornan di mas fini sofisticada di Aruba, el a cose hopi, pero hopi bistirnan di ricibimento y of di bruid.

Outfitnan bunita pa hopi cliente, entre nan, pa mi bunita Tia Hulandes Tante Gerrie tempo nan tabata biba aki na Aruba, famia Andre (Boy) Bergen, awor ya pa añanan bek na Hulanda.

Mona tabata cose bikini, bistir, carson, blusa, saya etc., pa grandi y chikito. Si, awe, nos ta pone mas lus riba e dushi hende aki, un Arubiano original cu un curazon masha grandi y masha bunita mes cu hopi amor pa su prohimonan ruman.

Pabien lieve Mona, cu Tata Dios sigui drama su bendicion riba bo awe y semper cu salud, amor, alegria y sabiduria. Danki pa a habri cas y curason pa nos y tur esnan cu a bin di sorpresa celebra cu bo, bo di 75 primavera yen di dushi ambiente!!!! Y pa Carnaval.....te otro aña cu Carnaval 66 cu dushi beis !!!

A conmemora e grupo di Arubiano cu a drenta servicio militar 50 aña pasa



DIADOMINGO 3 di maart 2019 na Misa Juan Pablo II a celebra un Santo Sacrificio p'e grupo di "Lichting 69/3" cu a recorda cu 50 aña pasa nan a drenta servicio militar.

Hopi recuerdo nan tin. Nan ta corda cu nan t'e ultimo "lichting" cu a bay Corsou. E dianan aki nan a ser prepara manera cu nan tabata sa cu algo lo bay pasa. Nan a presencia 30 di mei 1969 momentonan inolvidabel pa nan.

Miembronan cu tabata presente n'e Santo Sacrificio ta: Lopez, Chaljub, Vrolijk, Trimon.

Otro miembronan cu pa motibo di enfermedad, biahe, y of a bay sosega, biba den exterior.

Miembronan ausente tabata: Orman, Rosel, Werleman, Hernandez, C. Maduro, Geerman, Winterdal (Colombia) Semeleer (Hulanda) P. Ras, R. Ras, Bruinburg, Martha, C. Maduro, Willems q.e.p.d., Martes, Cremory q.e.p.d., Jones, Wilson, T. Maduro q.e.p.d.

N'e Santo Sacrificio, Pastoor Jan a bendiciona e miembronan presente y nan a haya un medaya recordando 50 aña di servicio.

Nos kier a felicita nan pa nan bunita trabou pa nos pais.



Lansamento di plataforma digital di coleccion nacional

BIBLIOTECA Nacional Aruba ta duna acceso na un parti di su coleccion nacional pa medio di un archivo digital. Esaki ta un plataforma digital cu ta ofrece acceso liber na estudiante, bishitante en busca di informacion, investigadornan. Meta ta pa duna acceso na un y tur.

Na departamento Arubiana/Caribiana di Biblioteca Nacional Aruba a digitalisa diferente items interesante pa publico general por wak. Interesadonan por wak e coleccion for di cas mes, ta trata potret y documento, corant, revista, tesis y diferente otro publicacion cu ta forma parti di e coleccion nacional.

Diahuebs 7 di maart ta lansa e coleccion aki oficial. Esaki ta tuma lugar na departamento Arubiana-Caribiana, ubica na Bachstraat 5, Oranjestad. Riba programa tin tres orador cu lo papia riba temanan manera herencia documental, preserva informacion historico y cultural, digitalisacion duradero y acceso na informacion. Oradornan ta drs. Peter Scholing (Biblioteca Nacional Aruba), drs. Raymond Hernandez (Archivo Nacional Aruba) y sr. Renwick Heronimo MA (Fundacion Museo Arubano).

Cu e lansamento di e coleccion digital un parti di coleccion nacional documental y audiovisual di Aruba ta bira mas visibel pa mundo henter. Tambe di e manera aki ta lanta mas interes pa loke tur e coleccion tin di ofrece.

Un invitacion ta bay pa comunidad pa diahuebs 7 di maart 7:30pm den hardin di departamento Arubiana/Caribiana, Bachstraat 5, Oranjestad.

Pa pregunta of mas informacion por tuma contacto na 582-6924 of via email: digital@bibliotecanacional.aw



Muchanan di Iris Speelschool a celebra Carnaval 65



IRIS Speelschool situa na Paradera a tene su eleccion di Reina y tambe Prins cu Pancho conhuntamente cu su jump-in yena cu hopi ambiente. Tabata un dia yena cu hopi creatividad y gozo.

Aki tur e muchanan a goza na smaak di Carnaval 65 y a jump un mundo bou di e ritmonan di soca, caiso y hasta tumba. Tur e alumno y maestranan a bin disfrasa cual a trece sigur un dushi ambiente di Carnaval na scol.

Heavenly Croes a keda eligi como e Reina di Iris Speelschool, Primera finalista a keda den persona di Xiaoling Wong y Princesita a keda den persona di Kaylie Giel. Prins a keda den persona di J Rudmar Dirks y Pancho den persona di Zyler Lopez.

Rosa de Windt a bira Reina di Carnaval di Club Kibrahacha 60+





DEN un ambiente Carnavalesco Club Kibrahacha 60+ a celebra Carnaval 65 cu su miembronan, bo-luntario y invitadonan na su cede na Piedra Plat. Cu e ambiente musical di Melow Band tur presente por a disfruta di un dushi ambiente di Carnaval. E celebracion di Carnaval a cuminsa despues di a anuncia e Prins y Pancho di Club Kibrahacha cu bira sr. Efraim Leest y sr. Benjamin Rosa.

P'e eleccion di Reina di Club Kibrahacha 60+ tabatin 6 participante: Adelaida Ponson-Arends, Petronilia Grovell, Rosa de Windt, Gojita de Cuba, Susana Maduro, Nicomeda Kock.

Durante e celebracion di Carnaval e cuerpo di hurado tabatin e tarea dificil pa eligi e Reina di Carnaval di Club Kibrahacha 60+.

E cuerpo di hurado tabata consisti di sr. Rene Ridderstap, Irma Gordan, Mena Ridderstaat y Maggy Everon. Un danki special ta bay n'e cuerpo di hurado cu a dedica nan mainta pa tuma un tarea asina dificil pa finalmente Club Kibrahacha 60+ tin su Reina di Carnaval 65.



Reina di carnaval 65 di Club Kibrahacha 60+ a bira Rosa de Windt. E participante cu a ricibi mas like riba Facebook di Club Kibrahacha 60+ a bira Nicomeda Kock. Un pabien ta bay n'e ganadornan. Club Kibrahacha ta gradici tur e participantenan pa nan bunita presentacion.

Durante e celebracion Carnavalesco, Olivia van der Biezen a bira Reina di Boluntario di Club Kibrahacha 60+.

Olivia ta haci trabou boluntario dos vez pa siman na Club Kibrahacha.



Tur presente por a goza di un tremendo ambiente Carnavalesco duro y fuerte cu Club Kibrahacha 60+ a ofrece tur presente. Club Kibrahacha 60+ ta e centro di ambiente y di actividad pa tur 60 plus na Aruba.

Gerencia di Club Kibrahacha 60+ ta gradici Superfood y Compra NV cu a sponser e bunita celebracion aki. Tambe un palabra di gradicimento ta bay na tur boluntario cu a yuda hasi e celebracion aki exitoso. Gerencia di Club Kibrahacha 60+ ta gradici tur cu a yuda realisa e fiesta di Carnaval 65.



Mario Lobo ta domina ranking overall 2019 den Tennis di Mesa



FEDERACION di Tennis di Mesa, tur luna ta keda activo unda ta hunga e torneo di ranking di cada luna p'asina e atletanan por defini nan posicion.

Den e ultimo dos simannan aki a hunga e ranking di februari den e diferente categorianan. Mas cu claro un di e mas interesantenan ta A-klas unda Mario, Andy, Jeandry y Chingho ta bataya fuerte p'e prome posicion.

Mester bisa cu un bes mas Mario Lobo ta dominante y ta bolbe sera un otro luna na prome lugar. E resultadonan final den ranking di februari ta como lo siguiente: Den e Cat U11 nos tin na 1er lugar Dylan de Leca, na di 2do lugar Ethan Fan y na di 3er lugar e keda Chase Fan.

Den e Cat U18, na 1er lugar nos ta haya Jeandry Mathilda, na di 2do lugar Johnatan Paredes y na di 3er lugar Josielienne Boekhoudt.

Den e Cat A Klas nos ta haya na 1er lugar, Mario Lobo, na di 2do lugar Jeandry Mathilda y na di 3er lugar Chingho Chung.

Por ultimo nos tin e Cat B klas unda na di 1er lugar nos tin Wing Chow Leong, na di 2do lugar e keda James Letren y na di 3er lugar a keda Donald Yarzagaray.

Stichting Sportsubsidie Aruba ta contento di por aporta y brinda e ayudo na Federacion di Aruba Table Tennis pa cu nan actividad di Ranking 2019. Alabes ta felicita e atleta Mario Lobo cu ta lidera e table di posicion den 2019.

Nagico ta entrega Kenray Anthony Jonas su premio di 1 aña gratis di gasolin



DIABIERNA, 1 di Maart den presencia di diferente empleado di Nagico a entrega e premio di campaña di ‘Cambia, Spaar y Gana’ na Kenray Anthony Jonas, ken a bira e ganador absoluto di gasolin gratis pa henter 1 aña.

‘Cambia, Spaar, y Gana’ ta un campaña cu a gara masha atencion durante temporada di fin di aña, alabes durante di temporada di Carnaval. Tur cliente di Nagico por a participa pa gana gasolin pa 1 aña gratis y alabes centenares di premio.

Nagico un bes mas ta contento cu e acogida di e campaña y ta felicita y gradici tur cliente cu a participa y a gana. E meta principal ta pa tene nos clientenan satisfecho y contento den un forma creativo y dibertido.

Forma parti di e famia di Nagico door di simplemente cambia pa Nagico y spaar 15% of mas ariba bo seguro di auto. Manda copia di polisa existente, copia di rijbewijs na 592-3378. Pasa na nos oficina na Dakota of Sava-




neta, habri di Dialuna pa Diabierna entre 8or di mainta te cu 5or di atardi. Of simplemente yama 588-7000 pa mas informacion.

Nagico un biaha mas ta felicita Kenray Anthony Jonas y tur otro ganador durante di e campaña. Like e pagina di Facebook di Nagico pa mas promocion y campaña durante 2019.

Bonaire tambe a celebra Carnaval

Parti 1



Bonaire tambe a celebra Carnaval

Parti 2



For di awor negociantenan por haci nan declaracion online di 'Algemene Bestedings Belasting' (ABB) y 'Loonheffing' (LH)

KRALENDIJK - Entrante febrüari 2019 ta posibel pa empresarionan haci declaracion di ABB/LH online. Belastingdienst/CN (B/CN) a digitalisá e proceso di declaracion y esaki tin un cantidad di bentaha grandi.

PROCESO MAS FÁCIL

E proceso ta bira mas fácil, mas rápido y cu ménos chèn pa fayó tanto p'e empresario como pa Belastingdienst. Ta manehá tambe un archivo digital p'e empresario.

No ta necesario mas tampoco pa busca un stèmpel na Oficina di Belasting òf pa manda e declaracionnan cu pòst, entrega digital ta suficiente.

AUTORISACION

Empresarionan por autorisá un consehero fiscal tambe y e ora ey tur dos tin bista riba progreso di e declaracionnan (ya entregá).

Tambe nan por duna di conocé si nan



kier haci nan declaracion di ABB/LH pa luna, pa kwartal òf pa aña.

Declaracion y pagonan mester ta entregá na Belastingdienst denter di 15 dia despues cu bo periodo vence.

INFORMACION


Den caso di pregunta por tuma

kontakto cu e 'helpdesk' di Belastingdienst/CN via di telefòn +599 7158545. Esaki por di dialuna te cu diahuebs, di 8 or di mainta pa 12 or di mèrdia y di 2 or pa 4 or di atardi. Tambe ta posibel pa manda un e-mail na helpdesk@belastingdienst-cn.nl.



**Sintonisa tur merdia e duo di periodista
Alexa Werleman y Victor (Toko) Winklaar
Den Noticia na G-FM 99.9**

**Di dialuna pa diabierna
cu noticia sin miedo**



Asina ela deklará

George Jamaloodin no ke bin Kòrsou pa trata su kaso



WILLEMSTAD. Den un entonashon di palabranan skèrpi, e sospechoso George Jamaloodin diadomingo durante e videoconferencia pa tratamentu di su kaso a bisa wes mr. van Lieshout i representantenan di Ministerio Públiko den persona di mr. Gert Rip i mr. Ivo Out ku e no ta dispuesto pa bini Kòrsou pa presensia tratamentu su kaso.

Segun George Jamaloodin a bira un kustumber ku Ministerio Públiko ta harma hinter un show ku tin e efekto di humiliá i ofendé tantu e mes personal komo su famia.

Mester dal su man ku pianan den bui, tapa su kara, rondon'é ku agentenan di siguridat, kore ku outonan ku sirena su tras na kaminda pa sala di korte, komo si fuera ta un kriminal e ta. Anto den oranan di anochi ta pasa e suseso aki un biaha mas riba televishon.

Den palabranan kla señor George Jamaloodin a duna di konosé ku e aktitut aki ta unu di puru abuzu pa un suidadano manera e ku ta totalmente inosente, pasobra 6 ½ aña outoridatnan a kore su tras sin a logra haña ningun prueba kontundente ku e ta metí den e asesinato di Helmin Wiels, esta e kaso Maximus. Manera ta konosí Ministerio Públiko ta akusá George Jamaloodin di ta e outor intelektual di e likidashon di Helmin Wiels, esta e persona a

duna enkargo pa mata señor Wiels na pir di Mari Pampun dia 5 di mei di aña 2013.

Bibu ta den señor George Jamaloodin su memoria ainda e manera kon a transport'é trese for di eksterior, ku masha sansaña negativo rondó di su persona.

Apsolutamente George Jamaloodin no ke pone su mes disponibel pa sirbi e nesesidat aki di Ministerio Públiko tin.

E ta preferá keda Boneiru i meskos ku diadomingo i dia 21 di febrüari último tabata e kaso, pa atendé su kaso via videoconferencia direktamente for di Boneiru.

Señor George Jamaloodin ta enkarselá aktualmente na Boneiru i diadomingo a ilustrá ku su trato na e isla hermana ta sosodiendo di un forma aseptabel, sin muchu demostrashon di poder.

Tin dos polis ta bin kada biaha huntu kune na e sala aya na Boneiru pero, por lo demas no muchu kos.

Ta komo si fuera na Boneiru no tin e nesesidat pa laga bui su man ku pianan, mara su kara i rondon'é ku asina tantu agente di siguridat, bati sirena durante ku ta hib'é na e sala en kuestion.

George Jamaloodin poko despues a haña respaldo fuerte di su abogado mr. Eldon "Peppie" Sulvaran kende tambe a kondená e práktikanan aki ora ta atendé ku detenidonan.

Mr. Sulvaran, meskos ku su kliente Jamaloodin a splika ku e tipo di tratonan aki tin su impakto sumamente negativo riba kada suidadano ku pasa aden i ta algu completamente kondenabel.

Wes mr. van Lieshout a palabrá diadomingo dia 11 i 12 di yüni binidero

komo fechanan ku lo trata e kaso aki riba kontenido, pero dia 18 di aprel tambe lo bolbe repasá algun punto di palabrashon, pa mira te kon leu a yega ku kulminashon di prosesonan i òf palabrashonnan andando.

Wes diadomingo ademas a rechasá e proposishon i ponensia di abogado mr. Sulvaran ku no por duna balor na deklarashonnan di Juvensly Maria komo ku ta trata aki, segun e abogado, di un pashènt sikiátriko, un adikto di droga ku a sufri daño un mental.

Tambe wes a rechasá e petishon pa skucha algun testigu, pero a keda solamente ku lo purba haña e testigu Rombley huntu ku un otro testigu mas pa bin duna deklarashon.

Hopi krítika tantu e akusado George Jamaloodin komo su abogado Eldon Sulvaran a ekspresá pa e forma kon Ministerio Públiko ta atendé e fail di e akusado aki.

Tin e fuerte sospecho ku deliberadamente ta laga informashonnan importante afó ku ta netamente esnan ku ta duna un bista mas hustu i korrektu di George Jamaloodin.

Por ehèmpel e abogado a trese ampliamente padilanti ku ta manera no ke añaadí sierto partinan di e fail di Nini Fonseca, ku resultadonan di algun investigashon na esun di George Jamaloodin.

Tratamentu di kaso estilo "regie" diadomingo a tèrminá ku dia 18 di aprel binidero lo kontinuá ku tratamentu di e kaso, siendo dianan 11 i 12 di yüni ta keda reservá pa tratamentu di e kaso riba kontenido.

Wes mr. van Lieshout a keda ku lo e bai studia e asunto di presensia personalmente di George Jamaloodin na e tratamentu dia 11 i 12 di yüni.

Te na Brazil

Sospechoso di asesinato Robertico Inesia arestá

WILLEMSTAD. Korantnan na Ulanda ayera mainta tur a referi ku titularnan grandi na e hecho ku polisnan brasileño na Sao Paulo a arestá e fugitivo kurasoleño Robertico Inesia di 37 aña di edat kende polis tabata buska 4 aña kaba na Ulanda riba sospecho di asesinato.

E asesinato a sosodé den un café-restorant ku yama La Suegra na Den Haag kaminda ela mata Jursley Cijntje i heridá un otro persona seriamente.

Jursley Cijntje

Direktamente despues dje asesinato Robertico Inesia a disparsé for di fas di tera i tabata riba e lista di Interpol di personanan ku hustisia ulandes ta buska.

Ademas tabatin orden di aresto internashonal pa kaptur'é.

Un tempu polis ulandes a ofresé un rekompensa di 15.000 Euro pa su kaptura of informashon ku kondusi na su aresto.

kiko tabata e motibu dikon Inesia a mata Jursley Cijntje (31) den café La Suegra te awe no ta konosi ounke e semanario Elsevier a raportá e tempu aya ku Jursley Cijntje tabata miembro di No Limit Soldiers.

Reportadamente Inesia a haña pleitu ku Cijntje pa motibu di muhé segun mama di Cijntje. En todo kaso nan no a pleita pa motibu di plaka of droga.

'Tico' Inesia

Polis brasileño a arestá Tico Inesia den un apartamento ku e tabata alkilá na São Vicente na Sao Paulo.

Den su apartamento polis a haña 83.000 pilchi di XTC i polis brasileño tabata dos luna kaba ta sigi su pasonan pa su kontakto ku narkotrafikantenan.

Segun korant na Brazil, e tabata hasi kontrabanda di droga via haf di Santos pa Rio de Janeiro i ei einan pa Sao Paulo.



Cambio di mando p'e compagnie di ehersito di tera na Còrsou

WILLEMSTAD - Inicialmente e ceremonia di cambio di mando n'e compagnie di ehersito di tera Hulandes na Còrsou tabata pa tuma lugar dialuna despues di Carnaval, pero pa motibo di e fiesta popular, a tene e ceremonia diabierna mèrdia riba tereno di Marinebasis Parera.

E di 29 compagnie ta bay Hulanda y e di 30 compagnie consistiendo di miembronan di ehersito na Schaarsbergen ta re-emplasá nan for di dialuna ultimo.

E Comandante saliente, kapitan Mark di e tropanan di atake cu base na Assen a repasá e ehersicionan intensivo cu a tuma a lugar ultimo 4 lunanan den nos region na cual como 100 militar a participá.

Hopi biaha e ehersicionan tabata den combinacion cu milicia di Aruba y Corsou, pero tambe cu Cuerpo Policial y VKC:



Nan a haña training den dominá lantamentu y manifestacion violento.

Aparte di esey nan a asisti Ministerio Publico tambe durante operacionnan di entrada hudicial.

CIDW ta parti integral di presencia di Ministerio di Defensa den Caribe.

Nan ta cambia cada 4 luna pa nan tin experiencia pa actua den clima cayente y seco.

Den caso di calamidad tambe nan ta duna asistencia na nos islanan. E compagnie nobo ta sera conocí cu nos medio ambiente, manera flora y fauna den nos clima tipico.

Dos aña pasá korte a kondená Mildred M. den kaso di Isenia

WILLEMSTAD. Un kaso ku ta relashoná ku detenshon di Tico Isenia na Sao Paulo diadomingo ta esun kaminda korte na Den Haag a trata i kondená e señora Mildred M., (43) tempu e tabata biba na Capelle aan den IJssel. Nan a sospech'é di ta involvi den e kaso di asesinato kaminda Tico Isenia a tira mata Jursley Cijntje den un café.

E asesinato tabata den oranan di mardugá grandi mitar di sinku.

E tempu aya Elsevier a spekulá ku Jursley Cijntje lo tabata miembro di NLS i ku Isenia lo tabata miembro di un banda rival.

Jursley Cijntje no tabatin masha tempu na Ulanda dia Isenia a mat'é pero a bai Ulanda pa bai biba serka mama di su yu.

Hustisia a sospecha ku Mildred M. tabata kómplise dje asesinato. Hustisia ta sospechá ku ta Mildred a bai e café ku e arma skondi den su paña interior pa asina pasa e ama di kontrabanda.

E señora a desmenti te na morto i hustisia a pèrmit pa e keda den libertat te dia su kaso bai dilanti. Tres luna despues polis a bolbe arestá Mildred pasobra ela hòrta un bolo. Outoridatnan a sera Café La Suegra despues dje asesinato.

Rekomendashon negativo pa Ramon Chong bira komisario na C-Post N.V.

WILLEMSTAD. Analisando un karta di rekomendashon of desaprobashon ku Konsehero di Gobiernu SBTNO a traha riba kandidatonan pa bira komisario na diferente fundashon di gobiernu, a bin sali na kla ku SBTNO a duna un rekomendashon masha negativo riba kandidatura di e èks diputado pa Partido Nashonal, Ramon Chong, kende tabata direktor di Departamento di Asuntunan Ekonomiko di gobiernu sentral di Antia entre 1995 i aña 2000.

Sin duna mas detaye, SBTNO a informá minister Zita Leito (PAR) ku e órgano tin opheshon masha isá kontra e kandidatura di Ramon Chong pa bira komisario na C-Post.

(Por lo general i kasi tradishon den e pais aki ku ora un minister nombra un komisario na un empresa of fundashon di gobiernu ta un partidario nan ta preferá di nombra i den e kaso aki ta un minister di PAR a postulá e èks direktor).

Ta resientemente, dia 22 di yanuari ku Minister Zita Leito a manda un karta atrobe pa SBTNO a base di un desishon ku Konseho di Minister a tuma dia 24 di òktober aña pasá pa postulá e kandidato aki a hasi un análisis i a chèk kiko ta e eksigenshanan ku un komisario mester kumpli kune pa bira komisario na C-Post International N.V.

Despues di a analisá e situashon SBTNO a hasi algun rekomendashon pa restrukturá e gerensha i kombiná funshon di tal forma ku esei ta hustifiká pa nombra 5 komisario pa e tareanan spesifikiko di e kompania.

E sinku miembronan aki por skohe ken ta bira presidente.

Aktualmente falta dos komisario pa nombra pero SBTNO a komprondé ku nan a nombra

Maritza Martis komo eksperto finansiero i sra. Borrebach komo spesialis den merkadeo.

Manera NOBO a relatá kaba den otro sekshon dje edishon aki despacho di minister Zita Leito a rekomendá Ramon Chong a base di e hecho ku entre otro ela traha komo direktor di Departamento di Asuntunan Ekonomiko di Antia. Despues di esei ela bai manera den un limbo i tabata konektá ku diferente otro aktividat te ku aktualmente e ta direktor di un ofisina di konsultent riba tereno finansiero i logistika.

E minister ku a rekomendá su pesonan a yega ne konklushon ku basá riba su karera e por duna un kontribushon util na C-Post International.

Solamente ku riba e punto aki SBTNO ta diferensha di opinion ku e minister pasobra ningun kaminda a señalá ku e tabatin eksperensha komo komisario na un empresa of fundashon sea privá of di gobiernu.

Por lo tantu direktor di SBTNO, mr. Donald de Palm, a manda pidi e minister mas informashon riba su kapasidatnan i SBTNO a haña un litania di lugánan kaminda Chong a traha pero ningun den kapasidat di komisario. E minister no por a konvensé Konsehero di gobiernu ku e kandidato tin e kondishonnan pa supervisá un ret di distribushon i transporte manera C-Post i e hecho ku durante su estudio na Merka ela traha yen di trabou ku a duné eksperensha, no tabata sufisiente pa SBTNO.

I te ora ku ela haña eksperensha, esei tabata 30 aña pasá i awe nos ta biba den un komunidad moderno.

En todo kaso minister Leito no por a konvensé SBTNO ku e kandidato i por lo tantu Konsehero di gobiernu no a aprobá su kandidatura.

Loke no ta kita ku e minister por nombré tòg pero esei ta material pa oro kapitulo.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444

Pa su agresividat

Korte a kita dos yu for di tata 'mecha kòrtiku' na Breda

WILLEMSTAD: Un kurasoleño ku ta biba na Breda a pèrdè tutela riba su kuater yunan pasobra e ta bira asibna emoshonal ora outoridat of instanshanan di protekshon di mucha reklamé, ku e wes a disidi pa enkargá un Instituto Sertifiká ku tutela dje muchanan.

Piò dje kaso ta ku e homber ta kria su yunan masha bon pero asina tin un problema ku terser partido, e ta bira kos ku no ta sirbi i ta menasá di kap i tira mata e persona ku kousa su furia.

Wes a haña ku bou dje sirkunstanshanan aki e muchanan no por lanta i a konfirmá ku nan mester keda serka un otro famia di kriansa.

Dos di nan en todo kaso.

Por sierto ku un tribunal den promé instansha a disidi esei pero e mayornan – maske nan no ta biba huntu – a apelá e desishon.

Awe e outorisashon pe yunan keda serka un famia di kriansa mester a vense, pero djabierne ultimo wes a duna Voogdijraad pèrmit pa prolongá e outorisashon pa nan keda ne kas di famia.

E pareha ta mama ku tata di dos yu di 10 i 12 aña. E dos otro yunan tin otro tata.

For di november di 2017 e yunan ta keda serka e tata pero dia 17 di desèmber korte a duna pèrmit pa kita e yunan for di dje.

Motibu pa esaki ta ku e homber ta masha agresivo kendenan ta kedando serka nan tata na Ulanda for di dia ku nan regresá for di Korsou.

E motibu direkto pakiko a tuma e medida drástiko ta pasobra e homber lo a klap un otro mucha na skol di su yunan.

E homber a splika ku ta djis un 'tik' ela duna mucha i no a hasi ni denunsia kontra dje.

E homber a splika ku e ta kuida su yunan masha bon, nan ta kome na ora, nan ta bisti manera debe ser i ta bai skol na tempu.

E ta rekonosé ku e sa bira emoshonal pero tur siman e



ta papia ku Wijkagent i e kontakto ta bon.

Sinembargo tabatin un punto kontra dje: e tabata bou di tratamentu pa su atakenan di rabia pero a stòp ku e tratamentu motibu pa kual Voogdijraad a pidi wes pa laga e muchanan serka e famia di kriansa.

Voogdijraad tin tinu pe muchanan pero aktitut dje tata ta difisil i simplemente nan no por komunika kune.

Un problema adishonal ta ku e mama dje muchanan no ta buska nan drechi i ta laga tur kos den man dje tata. Ademas komportashon dje muchanan ta straño den e famia di kriansa.

Promé ku tuma kualke otro desishon, wes tabata ke pa investigá e situashon dje tata i den e kas di famia di kriansa.

Voogdijraad a insisti pa no manda e muchanan pe pasobra su mecha ta muchu kòrtiku.

Straño ta ku e tin bon kontakto ku e mama i e Wijkagent ta intermediá pero no tin fin pe buska un kurso di 'anger management'.

Otro problema ta ku for di 2013 tin problema relashonal den e famia i na 2016 nan a investigá e kaso pero no por a sigi pasobra e mama a bin Korsou ku su yunan. Voogdijraad Ulanda a manda e dokumentonan pa Voogdijraad Kòrsou pero nunca nan a tende mas di nan.

Maske no tabatin insidente, tabatin preokupashon pasobra e homber ta partikularmente agresivo kontra polis i ta kla pa tira i buska kuchú.

E mes a hasi trabou di wes fasil: ku un karakter agresivo asina e no por keda ku su yunan.

Akusado pedofil lo tende kuantu kastigu e lo haña aki dos siman

WILLEMSTAD. E kaso di aktonan immoral mas komentá durante último añanan ta esun kaminda e suidano Radovic Rodriquez di 49 aña (ku un nomber ku pare kombinashon di Kroata i Portugues) a keda akusá di a violá yu di 1 aña i dos luna di un komersiante chines.

Tabata 8 di novèmber 2018 ku e akto baho i horroroso aki a sosodé kaminda e hòmer aki a hinka su parti íntimo den boka di e beibi di 1 aña i 2 luna. E suseso aki a tuma lugá den un supermerkadu den e bario Buena Vista.

Abogado di e akusado Radovic Rodriquez tabata mr. Koendjebiharie.

Ta un suseso ku a tuma lugá ku un durashon di aproksimadamente 1 ora i 20 minüt segun kalkulo di fiskal señora mr. Dennaoui-Simon.

Den sala di korte djabièrnè 1 di mart a pasa e grabashonnan hasí atraves di kámaranan di video instalá den e negoshi, kaminda a mira e hòmer aki drenta i sali e negoshi algun biaha, kaminda kada biaha e tabata bai bèk na e garoshi di tienda den kua e beibi aki tabata sintá.

Segun e akusado Radovic Rodriquez e tabata mal bura-chi e dia ei komo ku un amigu di dje a hasi aña i nan a selebrá e kumpliaño di manera ku el a dal masha hopi beter mes. Wes mesora a puntr'é si den dia tambe e ta bebe.

Remarkabel ta e hecho ku Radovic a ninga redonda-



mente ku el a violá e mucha menor di edat aki.

Por lo tantu wes a disidí di laga pasa e imágennan di video kamidna por mira e mucha klaramente sintá den e garoshi i ku e hòmer aki na sierto momento pegá na e garoshi aki ku den su man pasá parti patras di e mucha chikitu aki su kabes.

Vários biaha wes mr. S. M van Lieshout konsientemente a laga para e video pa puntra Radovic Rodriquez kiko e tabata hasiendo ku e mucha na sierto momentonan ku klaramente por a mir'é den akshon immoral.

Kada biaha Radovic Rodriquez tabata kontestá, bisando ku ta djis hunga e tabata hunga ku e beibi. Pero tabatin momento ku klaramente por a mira kon e malechor aki tabatin su parti íntimo hinká den e kriatura su boka i tabata tene e mucha na su kabes i peg'é na su kurpa na altura di su kil di karson.

Fundador di kadena di Fast Food H. van Grieken a fayesé

WILLEMSTAD. Den transkurso di ayera e notisia a sali ku e fundador di e kadena di Fast Food bou di e nomber HURCO konsistiendo di e restorantnan Subway, Pizza Hut i Kentucky Fried Chicken, sr. Hubert

van Grieken a fayesé na edat di 88 aña.

Anterior na a funda HUCOR i e kadenanan, e tabata akshonista di Antraco i ainda a laga den su herensha un fabrika di saku di plèstik.

Na desèmber ela bai pa eksamen mediko na Colombia i ayera ela fayesé.

Den su añanan hoben ela yega di traha na Venezuela tambe.

Pas na su alma i kondolensia ta bai na su famia.

Violador inmoral ta akusá chinesis di a pone trampa pe

WILLEMSTAD. Pa e supuesto inmoral i pedofil Radovic Rodriquez nada di e akusashonnan ku ela kometé akto inmoral ku un beibi chinesis no ta bèrdat, sino ta djis un trampa doño di e negoshi aki huntu ku un konosido reportero di radio Direct a traha pa inkriminá su persona.

Segun Radovic tur esaki, pasobra el a yega di hasi un denuncia na MEO ku a laga konfiská sentenáres di produkto i merkansia for di e supermerkadu.

Ketu bai segun Radovic ta un pelíkula harmá esaki ta pa tuma vengansa kontra dje. Mas aleu Radovic a sigui insistí ku e mes tynyú i ku sigur e no ta di e tipo ei pa hasi malu ku mucha.

Pero loke ta hasi e kos aki asina ferfelu i tantu den desbentaha di Radovic ta e hecho ku por a mira e suseso for di diferente ángulo, esei ke men ku no ta solamente un kámara a registrá loke a sosodé.

w

Bibu ta den kada ken su memoria ainda kon djis despues di e suseso aki e imágennan a plama práktikamente rònt Kòrsou i hopi hende hasta a ekspresá kiko den segun nan mester hasi ku Radovic.

Su reakshon ku ta un trampa doño di e negoshi a traha pe di e forma ei a zona masha improbabel mes. Wes a bisa ku strañesa ku den e rapòrtan e no a lesa ku Radovic tin tendensianan di pedofilia.

Ela pèrdè frei i tin ku bai será tambe

Christopher Vilchez kondená pa poseshon di arma di kandela



WILLEMSTAD. E suidadano Christopher Vilchez ta un yu di polis ku sin duda a pone kara di su tata terriblemente na bèrgwensa pa poseshon ilegal di arma di kandela. Christopher Vilchez ta un suidadano ku tin 30 aña di edat i tabata riba kareteranan públiko dia 10 di novèmber ultimo ora un hende a yama warda di polis pa bisa ku un persona lo tabatin un arma di kandela despues ku a tende bala a zona.

Esei tabata na altura di trùk di pan Nancy.

Segun Christopher Vilchez el a sali kas ku e arma di

kandela, pasobra su frei, kende tabata huntu kuné na e momento ei mester a pasa tuma un suma di plaka un kaminda. Ademas ta konosí ku tin personanan ku ta pèrsigui famia di e frei pa plaka.

Netamente pa e motibu aki Christopher Vilchez a sali kas ku e arma di kandela ku el a kumpra pa 1500 florin serka un portugues.

Pa loke ta su personalidat, wes a konstatá ku un faktor fuerte di Christopher Vilchez ta ku e ta bon den benedimentu di kos, na moda di papia e lo por ta un bon negoshante.

Riba e dia en kuestion Vilchez sintá den e outo tabatin e arma di kandela den su man ku tabata harmá kaba.

E kier a saka e bala, pero pa su mala suerte el a primi e gai di e arma i lògikamente e tiru a sali. Christopher Vilchez a move bai for di e sitio pa bai sinta kome su kuminda ku el a kumpra na e trùk di pan, pero polisnan a blo riba dje pa arest'è te kaminda ku e tabata. Remarkabel segun Christopher Vilchez ta e hecho ku asina el a kai será su frei a kibra kuné.

El a bisa wes ku ta duel e masha loke a pasa kuné i asina ei el a rekòrdá ku su tata kende ta polis semper a bis'è pa e keda leu for di aktonan ilisito. Fiskal mr. R Koert a demandá un kastigu di prizon di 18 luna di kua 8 kondishonal i un periodo di prueba di 3 aña, sinembargo wes mr. van Lieshout a wanta e kastigu na 12 luna di prizon di kua 6 kondishonal i un periodo di prueba di 3 aña.

Diadomingo nochi a trasladá Theo Heyliger di Islariba pa Boneiru

PHILIPSBURG- For di diadomingo mainta un grupo di simpatisadó di e politiko mas popular na Sint Maarten, Theo Heyliger, a reuni dilanti di sala di Korte di Hustisia na Sint Maarten sperando di por mira nan lider ora a traslad'é di warda di polis pa korte pa interrogashon serka wes-komisario.

Na final wes a disidi di prolongá su detenshon ku 8 dia i direktamente a disidi pa trasladá Heyliger for di Sint Maarten pa Boneiru kaminda e akomodashon ta muchu mas humano i moderno ku e rotsoi ku nan ta yama sèl di warda di polis na Sint Maarten.

No tin lugá pa Theo Heyliger den prizon di Pointe Blanche pasobra nan por sera 70 hende so den e prizon i pe keda será na warda di polis na Philipsburg no tabata opshon.

For di e siman aki tin regla nobo ta konta pa sera prezu



na Pointe Blanche pa kumpli ku nan derechinan humano.

Bou dje regla aki nan por tene un sospechoso maksimo 8 pa 10 den sèl di polis i si ta menor di edat no por ser'é mas ku tres dia sea kual sea e krimen ku ela kometé.

Ademas a pone limite pe kantidat di prezu ku por sera den prizon Pointe Blanche i fiskalnan lo kontrolá e kondishonnan den prizon regularmente.

E lugá ta pèstá di prezu

Hustisia na St. Maarten mester a laga tres prezu liber e siman aki

PHILIPSBURG. No ta pasa un dia ku e situashon den prizon di Sint Maarten na Pointe Blanche no ta den notisia sea na Ulanda of na Sint Maarten mes.

Gobiernu a pone komo limite un total di 70 prezu só nan por sera den e prizon sino tin ku manda sera nan den prizon na Boneiru of laga na bai kas.

tur esaki tin di haber ku nan derechi humano.

En todo kaso e tres prezunan aki a sinta mayor parti di nan kondena kaba i lo a sali liber e luna aki.

Ministerio Publiko tin miedu ku e situashon lo eskala den prizon Pointe Blanche pasobra e siman aki gerensha di prizon SDDK na Kòrsou a informá ku nan ta manda shete prezu bèk Sint Maarten den e dianan binidero.

Hecho ta ku e kondishon di sera hende den prizon di Pointe Blanche ta leu di ta ideal pa kualke prezu pero sí outoridat ta hasi distinsjon entre un prezu kondená i un sospechoso den detenshon preventivo.

Dia 19 di februari nan a arestá Heyliger i e tabata será na warda di polis pero e no por a keda mas eiden pasobra sino lo a violá su derechi humano.

P'esei a hibé Boneiru ku ta mas serka di Sint Maarten pero ta solushon temporal.

Simpatisadornan di Heyliger ta reklamando na Sint Maarten ku ulandesnan a skohe Heyliger komo nan viktima pasobra ela reklamá ku makambanan ta metiendo den politika na Sint Maarten.

Royal Aurora

Funeral Home & Crematory

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.
Cado Wever.

Nos ta anuncia fayecimento di:



Venancio Feliz Angela

Mihor conoci como "Felix" of "Cochise"
*18-05-1944 - †19-02-2019

Na number di su:

Mayoman:

†Ramon Marco "Chomon" Angela
†Rosa Angela-Kock

Rumannan:

†Ciriaco "Jaco" Angela
†Maria-Helena Ras-Angela y famia
†Franco Angela
†Reymundo Angela
Marina y Vicente Ras-Angela y famia
Ana Angela y famia
Shirley Angela y famia na Hulanda
†Orlando Angela
†Jose-Maria Angela

Sobrino(a)nan:

Johnny Ras y famia na Merca
Junior Peters y famia na Canada
Ophelia Ras y famia na Hulanda
Oriana Ras y famia na Hulanda
Janina Ras y famia
Gina Ras y famia
Ruthsella Adroun y famia na Hulanda
Terence Angela y famia
Henky "Ebby" Peters na Hulanda

Bisasobrina consenti:

Arianne Ras na Hulanda y tur demas bisa sobrino- y
sobrinanan na Merca y Hulanda.

Primo- y primanan, bisñanan, amigo- y amiganan y
conocirnan.

Demas famia: Angela, Kock, Ras, Peters, Provence,
Lemish, Lucas-Borges, Gomez, Lejuez, Gonzales,
Adroun, Wever, Falconi, Krozendijk, Thielman, Brete,
Thiel, Koolman, Sherwood, Croes, Tromp, Rasmijn,
Wester, Thode, Alberts, Weller, Werleman, Jansen,
Maduro, Trimon, Curiel, Yarzagaray, v/der Biezen,
Stamper, Rudolfo

Ta invita pa acto di condolencia y despedida, cual lo
tuma lugar dia 7 di maart 2019.

Nos difunto stima lo ta reposa for di 1'or te 3'or di atardi
den Misa Criso Rey na Brazil

Royal Aurora

Funeral Home & Crematory

"Dios ta amor... y amor ta Dios,
maske mi no ta na e mundo aki, tur dia lo mi ta banda
di boso Curazon, mi por steuns di loke Señor ta hasi"

Cu dolor na nos curason pero conforme boluntad di
Señor, nos ta anuncia fayecimento di nos difunto stima:

Rosalinda Dolorosa Ruiz-Croes

Mihor conoci como "Rosa"
*14-09-1940 - †27-02-2019



Na number di su:

Esposo:

†Teofilo "Filo" Ruiz

Yiunan:

Edgard Ruiz y yiunan
Roland Ruiz y Maria Eugenia y yiunan
Oslin Ruiz y Altagracia y yiunan
Jeffrey Ruiz y yiunan

Nieto(a)nan:

Ishomar y Zahira, Gwendolyn y Russel, Johnatan y
Darenska, Anabel, Melanie y Shawn, Eveliany, Tahane,
Melinda, Aldrin, Shaunro, Shaunric, Aaron, Gianmarc

Bisnietanan: Zamiriënne y Zaleah

Tata: †Johannes "Jendy" Croes

Mama: †Genoveva Croes-Kelly

Rumannan:

†Petra y †Beltran, †Carlito y Sita, †Cheby, Carmen y
†Rufo, Catrin, Nini y †Fеды, Ale y Irena, Alex y Maria,
Mario y Betty, Martino,
Selpha y †Coby

Suegroy suegra: †Guillermo Ruiz y †Annie Ruiz-Britten

Swa- y cuñanan:

Guillermo y †Astrid, †Modesto y Rocio, Ursulina y †Mai,
Bito y Filomena, †Eloy y Renolva, Margarita y Fabian,
Maria y Edwin, Rufo y Zulaika, †Tom, Ann y Franklin

Tanta- y omonan, primo- y primanan, sobrino- y
sobrinanan, conocirnan, bisñanan

Ayudante: Edith Pollo

Bon amiganan: Lucia Dijkhoff y Reina Dijkhoff

Demas famia:

Ruiz, Croes, Aristiqueta, Tromp, Flanegin, Pizarro,
Martinus, Laurence, Kelly, Soliana, Oandasan, Matilda,
Dijkhoff, Winterdal, Hoeverstz, Lopes, Giel, Geerman,
Bareño, Paterina, Petrochi, Wolf, Thiel, de Cuba, Bello,
Britten, Semeleer, Wever.

Ta invita pa acto di entierro cual lo tuma lugar na Misa
Sta Anna na Noord diaranson 6 di maart 2019 di 2'or
pa 4'or di atardi, despues lo sali pa Santana Catolico na
Noord.

Condolencia lo tuma lugar na Aurora Funeral Home
diamars 5 di maart 2019 di 7'or pa 9'or di anochi.

Nos disculpa si nos por a lubida un of otro famia of
conocir den nos tristesa.

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Cu dolor na nos curason pero conforme cu boluntad di Dios,
nos ta anuncia fayecimento inespera di nos difunto stima:

Epifanio Geerman

Mihor conoci como:
"Pief", "Mo Pief" of "Padu"
*30-01-1930 - †28-02-2019
Ex empleado di DOW



Na number di su:

Esposa: Gregoria "Goya" Geerman-Koolman

Yiunan stima:

Sotero "Solterito" Geerman
Juana Francisca "Nani" y Hendrick Donata
Semilina "Linchi" y Mirto Rasmijn
Zacharias "Shaída" Geerman
Maria "Mayra" y Venancio "Chonai" Angela
Angelcancio "Boysi" y Lucia Geerman-Boekhoudt
Thimotheo "Theo" y Sandra Geerman-Verhaar

Nieto(a)nan:

Gregory Donata, Lisette Donata y Norman "Juni" Provanze,
Zulaika Geerman, Luigi y Jermine Rasmijn-Daal, †Gerald
Donata, Suhaili Clarissa, Angelo y Melisa Rasmijn-Vrolijk,
Marylaine y Reangelo Koolman, Giali Rasmijn y pareha, Shaira
Clarissa y Kyle Perkins, Joangelo "Giovanny" y Lisette
Geerman-Gomes, Shadira y Jordano Blanco, Marianne Angela
y John Rijke, Angelic Geerman y Rodney Kelly, Shayen y
Carlos Quandt, Lugelca Geerman y Alex Da Silva Menezes,
Ayrton Geerman, Senna Geerman

Bisnieto(a)nan

Rumannan:

†Fechi y †Meme Geerman
†Francisco y †Meme Geerman
†Basilio y †Petra Geerman
†Dede y Jhoana Geerman-Angela
†Juancito y Juliana "Checha" Geerman

Ex suegro: Edward Clarissa

Amigo di cas: Margareto y Juanira Ramirez, Jolanda Tromp

Ayudante di Wit Gele Kruis; Robelca Geerman y otro
coleganan

Sobrino y sobrinanan, Ihanan, primo y primanan, comer y
compeman, bisñanan y tur su amigonan di Trappers, Domino,
Billiard, Voetball, softball, concirman y demás famia: Geerman,
Koolman, Donata, Rasmijn, Boekhoudt, Clarissa, Angela,
Verhaar, Provanze, Daal, Maduro, Irausquin, Curiel, martijn,
Castillo, Vrolijk, Perkins, Blanco, Gomes, Rijke, Kelly, Quandt,
Da Silva Menezes, ramires, Croes, Tromp, Werleman,
Peterson, Stamper, Erasmus, Schwengle

Ta invita pa e acto di entierro cu lo tuma lugar 8 di maart 2019
pa 4'or di atardi na misa Imaculada Concepcion na Sta. Cruz
despues saliendo pa Santana catolico Pastor De Vries. E
restonan mortal di defunto "Pief" lo ta reposa for di 2'or pm
den misa.

Adres di condolencia : Aurora Funeral Home, 6 di maart 2019
di 7'or pa 9'or pm

Enbes di flor of krans lo tin un box disponibel den misa pa un
bon causa.

Nos ta pidi nos disculpa si den nos tristeza nos por a lubida un
of mas famia.

Despues di entierro no ta ricibi bishita di condolencia na cas.

Royal Aurora


Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Cu dolor na nos curason pero conforme boluntad di
Dios nos ta anuncia fayecimento di nos difunto stima:

Imelda Beatrix Weller

Mi hor concu como "Tante Liesje"
*10-07-1940 - †24-02-2019



Na number di su:
Mayoran:
†Eloi y †Victoria Weller-Rojas

Rumannan:
†Ismael y yiunan
Haydee y famia
Francisco y famia
Beto y yiunan
Edy y famia
Ben y y famia
Mando y famia na Hulanda
†Manuel y yiunan
Calito
†Lulu
Ani y yiunan

Amiga(o)nan di cas:
Maria, Glenda, Maiky y Grace
Nea y Robert, Albert y Fernando

Ex coleganan di Gezondheids Dienst.

Iha: Tasha Yadira na Hulanda

Dos preti wowo:
Lyeve y Jaxx

Sobrina(o)nan, comper- y comernan, bisñanan y
conocinan y demas famia na Corsow, Hulanda,
Venezuela, Chile y Cuba.

Demas famia :
Weller, Rojas, Tromp, Rasmijn, Franken, Isaacs,
Oosterveen, Ruiz, Velasquez, Loopstock, Sanchez,
Bareño, Vries, Croeze, Wernet, Oduber, Croes, Dirck,
van Zwam, Mesu, Thiel, Praag, Jansen, Geerman,
Ders.

Ta invita pa acto di despedida cual lo tuma lugar na
Aurora Funeral Home diabierna 8 di maart 2019 di 9'or
pa 11'or di mainta. Cremacion lo tuma lugar den ceno
familiar.

Opportunidad pa condolencia lo tuma lugar na Aurora
Funeral Home diahuebs 7 di maart 2019 di 7'or pa 9'or
di anochi.

Disculpa nos si den nos tristesa nos por a lubida algun
famia of conocir.

Despues di ceremonia nos no ta ricibi bishita di
condolencia na cas.

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

A fayece:



Brunilda Lejuez-Rasmijn

Mhor conoci como: Tan Nilda
*09-09-1934 - †04-03-2019

Acto di entierio lo wordo anuncia despues.

Royal Aurora

Funeral Home & Crematory

Gradicimento y Invitacion

Pa medio di esaki famia kier a gradici tur esnan
cu na un manera of otro a duna nos sosten, consuelo y
forsa durante e tempo dificil cu e fayecimento y entierio
di nos defunto stima:



Sra. YVONNE HELEN MARTINUS

"Tanchi Von" – "Vontjes"

Boso muestra di atencion ta di hopi aprecio y un gran
sosten pa nos. Un danki na un y tur cu a manda carchi,
krans, whatsapp, email y a hasi yamada nan telefonico.
Boso muestra di atencion tabata un gran Consuelo pa
nos.

Na mes momento nos ta invita famia, bisña-, amigo- y
conocinan pa compaña nos na 2Santo Sacrificio di
Misa na misa diaranson 6 di maart na Pro Catedral San
Francisco pa 7'or y diabierna 8 di maart na Birgen di
Fatima pa 7'or pm.

Boso presencia ta altamente aprecia.

Royal Aurora

Funeral Home & Crematory

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur bunita.
Cado Wever

"Mi Dios, Mi Señor, Mi Salvador, Cu Bo amor infinito
tenemi den Bo braza
Ya no tin scuridad, Unicamente Bo Luz bryando."

Cu profundo tristesa na nos curason nos ta participa
fayecimento di mi mama, nos ruman y suegra stima:



Lucila Barrios Quintero

(viuda di Ariel Salomon Duarte)
*18-10-1948 - † 04-03-2019

Na number di su yui:
América y Jayesh Daryanani – Barrios

Rumannan, sobrino- y sobrinanan, conocinan.

Coleganan y cliente stima di Maristella, especialmente:
Sara, Irma, Velma, Marieta, Lorenzo, Valentino y Eloisa.

Demas famia: Barrios, Jaimes, Quintero, Daryanani,
Raghunath, Rosario, Kelly, Ackermans, Baena Castaño,
Arends, Lopez-Penha, Tromp.

Dia di condolencia lo ta diahuebs 7 di maart di 7:00or
pa 9:00or PM na Royal Funeral Home.

Ta invita pa condolencia y despedida diabierna dia 8 di
maart di 2:00or pa 4:00or PM na Royal Funeral Home,
despues cremacion lo tuma lugar den seno familiar.

Enbes di flor of krans lo tin un box disponibel pa
donacion pa Huize Maristella

Nos disculpa si den nos tristesa nos por a lubida un of
otro famia of conocir.

Nos disculpoa cu nos no ta ricibi bishita di condolencia
na cas.

When you go
through deep waters,
I WILL BE WITH YOU.
ISAIAH 43:2

Nos hendenan 'teribel' na Ulanda

Kurasoleño akusá di a choka hende mata a haña kastigu leve

WILLEMSTAD. Tur djabierne den kualke tribunal den kualke siudat ulandes tin kasonan penal i si-man pasá tabata meskos.

For di e variedat di kasonan nos tin pe okashon aki e kaso di un Kurasoleño 'yu'i Kòrsou (Sic!!) mester a presentá dilanti mesa bèrdè pasobra ela choka e kompañero nobo di su èks muhé pa mata lokual pa lei ta intento di homisidio.

No tabatin problema pa lokalisé pasobra dia e mester a presentá dilanti wes, a djis trasladé for di prizon De Schie pa korte.

Fiskal no a akus'é di intento di domisilio pero sí pa maltrato i a pidi

seis luna di prizon pe.

Ademas ku e tin ku mèldu regularmente serka hendenan ku a trat'é sikologikamente.

E maltrato a sosodé dia 2 di november 2018 na Bergschenhoek (i) munisipio 'Lansingerland' kaminda ela choka e èks amante pa mata, menasé ku un kuchú bisando ku 'mi ta mata'bo amigo si bo kibra mi relashon'.

E muhé ta mama di su yu pero ya no ta su amante mas.

E aktual amante a spanta pa muri i e muhé tambe a haña poko rasguño. E maltrato a sosodé den kas dje viktima pero ta resultá ku no ta promé biaha ku ta kondené' ñe pa maltrato.

Menos mal ku e biaha aki ela aseptá ku e ta kulpabel i ku e mester di tratamentu.

Ademas pa no kai den tentashon, dia e sali liber, e ta bai biba serka su mama.

Ademas e por haña su trabou bèk den konstrukshon.

Apesar di tur su bon intenshon, e no por keda sin haña kastigu pasobra den pasado tambe ela priminti shelu ku pampoena pero tòg a faya.

Wes a kondené na 180 dia di prizon pero despues di 100 dia e por bai kas basta e kumpli ku e kondishonnan ku wes a dikta.

Ademas e no mag muda for di kas di su mama i mester koperá ku Reclasing.

Ela sali di bon ku nan a kita tambe e dianan ku ela pasa den detenshon preventivo for di e 100 dianan basta no resultá ku ya nan a kita esaki for di un anterior condena.

SBTNO a aprobá dos hende nobo pero


Gaming Control Board ta drèi ku 1 komisario so

WILLEMSTAD. Na luna yanuari ultimo minister di Finansa a informá Konsehero di gobiernu SBTNO ku e tin intenshon di nombra dos komisario nobo den gerensha di Gaming Control Board. Gaming Control Board ta un instansha ku ta kontrola tur wega di plaka legal na Kòrsou i den pasado tabata den mira di parlamentarionan ulandes ku ta sensurá e hecho ku na nan pareser ta tolerá wega di number via Internet. E hunta tabata konsisti di 4 miembro pero tur a baha na 2017 di manera ku ta UN komisario so tin pa supervisá funshonamentu di gerensha. I esei pa un órgano asina importante ta simplemente insólito.

Pa solushoná e dilema aki un poko minister di Fiansa e proponé pa nombra señora Zulaika Lasten komo eksperto finansiero i presidente i Charlton Donker komo eksperto den labamentu di plaka via elektroniko. Tambe minister di Finansa a proponé Jamir Barton komo eksperto ekonomiko . Aktualmente ta un eksperto huridiko so ta komisario i pa re-forsá e kuerpo a postulá señora Lasten kende tabata sosio di PricewaterhouseCoopers. Sr. Donker ta eksperto den protekshon di sistemanan digital i señor Barton tin su mes empresa di konsultent. Sr. Barton ta Master den Accountancy i tabata un temporada hefe interino na Ministerio di Desaroyo Ekonomiko. Konsehero di gobiernu SBTNO tin pas ku e postulashonnan aki.

**Royal
Aurora**
Funeral Home & Crematory

Cu un tristeza inmenso den nos curason nos ta anuncia e fallecimiento di mi casá, nos tata, ruman y bon amigo



sr. Calvin Subaran


mihor conoci como "Suba".

Dia di condolencia lo tuma lugar diabierna dia 8 di maart di 7or pa 9or di anochi y diasabra dia 9 di maart di 9or pa 11or di mainta na Aurora Funeral Home.



AWEMainta

E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL